

**DEWAN RAKYAT
PEMBERITAHUAN PERTANYAAN
MESYUARAT PERTAMA, PENGGAL KELIMA
PARLIMEN KETIGA BELAS (2017)**

PERTANYAAN : BUKAN LISAN

**DARIPADA : YB DATO' KOH NAI KWONG
[ALOR GAJAH]**

SOALAN :

Dato' Koh Nai Kwong [Alor Gajah] minta **PERDANA MENTERI** menyatakan peruntukan di bawah Akta 505 yang memberi kuasa kepada mufti di negeri-negeri Malaysia untuk meminda, mengubahsuaikan atau membatalkan mana-mana fatwa yang telah dikeluarkan atau diwartakan oleh Majlis Fatwa Kebangsaan dan garis panduan resolusi yang akan dirujuk sekiranya bertentangan dengan dasar atau akta kementerian.

JAWAPAN: (YB MEJAR JENERAL DATO' SERI JAMIL KHIR BIN HAJI BAHAROM (B), MENTERI DI JABATAN PERDANA MENTERI)

Tuan Yang di-Pertua,

Sebagaimana Ahli Yang Berhormat sedia maklum, bahawa hal ehwal berkaitan agama Islam terletak di bawah bidang kuasa Kerajaan Negeri seperti yang diperuntukkan dalam Butiran I, Senarai II, Jadual Kesembilan, Perlembagaan Persekutuan. Justeru itu, Akta

Pentadbiran Undang-Undang Islam (Wilayah-Wilayah Persekutuan) 1993 [Akta 505] hanya terpakai dan berkuat kuasa di Wilayah-Wilayah Persekutuan sahaja. Manakala bagi negeri-negeri lain adalah tertakluk kepada Enakmen Pentadbiran Agama Islam negeri masing-masing.

Berkaitan dengan fatwa, dimaklumkan bahawa keputusan yang dibuat di peringkat Muzakarah Jawatankuasa Majlis Fatwa Kebangsaan adalah tidak mengikat sehingga Negeri-Negeri mewartakan keputusan tersebut sebagai fatwa. Pihak negeri boleh sama ada menerima pandangan hukum/fatwa yang diputuskan oleh Muzakarah Jawatankuasa Fatwa Kebangsaan itu tanpa pindaan atau meminda atau menolak kerana kuasa mengeluarkan fatwa dan kuasa untuk mewartakannya adalah di bawah bidang kuasa negeri-negeri yang diperuntukkan dalam Akta/Enakmen negeri masing-masing. Setelah sesuatu fatwa itu diwartakan di negeri berkenaan, warta tersebut hendaklah mengikat setiap orang Islam yang bermastautin di negeri tersebut. Dijelaskan di sini, bahawa, peruntukan mengenai fatwa adalah berdasarkan kepada Akta/Enakmen Agama Islam negeri masing-masing.

Misalnya, seksyen 34 Akta 505 memperuntukan seperti berikut :-

“34. (2) Tiada pernyataan yang dibuat oleh Mufti boleh diambil sebagai fatwa melainkan jika dan sehingga pernyataan itu disiarkan dalam Warta menurut subseksyen (1).”

- (3) Apabila disiarkan dalam Warta, sesuatu fatwa hendaklah mengikat tiap-tiap orang Islam yang bermastautin di Wilayah-Wilayah Persekutuan sebagai ajaran agamanya dan hendaklah menjadi kewajipannya di sisi agama untuk mematuhi dan berpegang dengan fatwa itu melainkan jika dia dibenarkan oleh Hukum Syarak tidak mengikut fatwa itu dalam perkara-perkara amalan, kepercayaan atau pendapat peribadi.
- (4) Sesuatu fatwa hendaklah diiktiraf oleh semua Mahkamah dalam Wilayah-Wilayah Persekutuan sebagai autoritatif mengenai semua perkara yang dinyatakan di dalamnya.”

Manakala seksyen 36 Akta 505 juga memperuntukkan bahawa fatwa itu boleh dipinda, diubah suai atau dibatalkan seperti yang berikut:-

“Pindaan, ubahsuaian atau pembatalan fatwa

36. (1) Mufti boleh meminda, mengubahsuaikan atau membatalkan mana-mana fatwa yang telah dikeluarkan sebelum itu olehnya atau oleh mana-mana Mufti terdahulu daripadanya.

(2) Sesuatu pindaan, ubahsuaian atau pembatalan sesuatu fatwa hendaklah disifatkan suatu fatwa dan peruntukan-peruntukan subseksyen (3) dan (4) seksyen 34 dan subseksyen (2) seksyen 35 hendaklah terpakai baginya.

(3) Sesuatu pindaan, ubahsuaian atau pembatalan sesuatu fatwa hendaklah menyebut bahawa ia dibuat menurut subseksyen (1)."

Oleh yang demikian, proses pewartaan pandangan hukum/fatwa yang di keluarkan oleh Muzakarah Jawatankuasa Fatwa Kebangsaan adalah tertakluk kepada Pihak Berkuasa Agama Islam Negeri masing-masing.

Kesimpulannya, Kerajaan sentiasa mengambil langkah berhati-hati dalam menyelesaikan isu-isu berkaitan agama dengan memastikan dasar-dasar dan pentadbiran negara menepati kehendak Syarak dan selaras dengan Perlembagaan Persekutuan serta undang-undang lain yang berkuatkuasa.

Sekian, terima kasih.